

Tiada lagi amah Indonesia tahun depan

➔ Jakarta larang penduduk jadi pembantu rumah di luar negara akhir Mei

■ Jakarta

Indonesia akan melarang penduduknya ke luar negara untuk bekerja sebagai pembantu rumah bermula akhir bulan ini.

Kerajaan republik itu juga memutuskan menghentikan sepenuhnya pembekalan amah ke luar negara menjelang tahun depan.

Menurut akhbar tempatan, larangan itu dikeluarkan atas arahan Presiden Joko Widodo.

Kementerian Tenaga Manusia republik itu mengumumkan penamatan bekalan pembantu rumah pertama akan membabitkan Asia Barat, diikuti Asia-Pasifik pada 2017, termasuk Hong Kong, lapor gerbang dalam talian, *Suara Merdeka*.

Teruskan jika ada padanan

Pengarah penempatan dan perlindungan pekerja luar negara di bawah Kementerian Tenaga Manusia, Soes Hindarno, memberitahu media minggu lalu, pembantu rumah yang mempunyai majikan sesuai di luar negara, membayar gaji yang baik dan menyediakan kemudahan, boleh terus kekal bekerja.

"Kedutaan Indonesia masih boleh memproses pembaharuan permit kerja jika wujud padanan majikan-pekerja yang baik. Namun, tiada lagi pembantu rumah baharu dari Indonesia menjelang tahun 2017," lapor *Tempo* memetik Hindarno.

Sasarannya adalah supaya semua pekerja tempatan di luar negara menjadi profesional sebenar yang bertugas di syarikat menjelang 2018, dan bukan lagi sebagai pembantu rumah.

MoU nafi hak asasi

Kajian pertubuhan bukan kerajaan (NGO) Migrant Care, baru-baru ini mendapati, memorandum persefahaman (MoU) di antara Indonesia dan beberapa negara mengenai penggajian pembantu rumah dari negara itu tidak mengandungi peruntukan hak-hak asasi manusia.

Pengarah Migrant Care, Anis Hidayah mengambil contoh MoU dengan Kerajaan Malaysia yang ditandatangani pada 2006, tidak menyatakan jam maksimum bekerja, usia minimum pembantu rumah dan hak mereka, termasuk kebebasan menyertai kesatuan sekerja.

AGENSI

BH
17/5/2016
m/s 3

[FOTO HIASAN]



Kedutaan Indonesia masih boleh memproses pembaharuan permit kerja jika wujud padanan majikan-pekerja yang baik.